



Na osnovu člana 88. tačka 11. i člana 145. stav 2) Statuta Javnog preduzeća Elektroprivreda Bosne i Hercegovine d.d. – Sarajevo – prečišćeni tekst, broj: NO-2190/21-41./2. od 25.01.2021. godine, i Statuta o dopuni Statuta Javnog preduzeća Elektroprivreda Bosne i Hercegovine d.d. – Sarajevo, broj: SD-20745/21-70./6. od 30.07.2021. godine, Uprava Društva na 267. sjednici, održanoj dana 11.08.2026. godine, donosi

ODLUKU

o kriterijima za utvrđivanje i obračun naknade štete u slučaju prijevremenog raskida Ugovora o snabdijevanju električnom energijom za tržišno snabdijevanje od strane Kupca zbog odabira drugog snabdjevača

Član 1.

(Predmet)

Ovom Odlukom uređuju se kriteriji, način utvrđivanja, obračuna i obrazloženja naknade štete koju je Kupac dužan platiti JP Elektroprivreda BiH d.d. – Sarajevo u slučaju prijevremenog raskida Ugovora o snabdijevanju električnom energijom za tržišno snabdijevanje (u daljem tekstu: Ugovor) od strane Kupca, prije isteka perioda važenja ugovorenih uslova snabdijevanja, radi odabira drugog snabdjevača.

Svrha ovog akta je da osigura transparentan, objektivan i ekonomski opravdan način utvrđivanja naknade štete, kako bi kupci imali jasan uvid u osnov, kriterije i način njenog obračuna.

Član 2.

(Definicija relevantnih obračunskih mjeseci)

Za potrebe ove Odluke, relevantnim obračunskim mjesecima smatraju se obračunski mjeseci koji pripadaju periodu od dana prijevremenog raskida Ugovora do isteka perioda za koji su ugovorene količine električne energije, a za koje uslijed prijevremenog raskida Ugovora nisu realizovane ugovorene količine električne energije.

Član 3.

(Ekonomska opravdanost naknade štete)

JP Elektroprivreda BiH d.d. – Sarajevo, kao proizvođač električne energije i snabdjevač električnom energijom u okviru tržišnog snabdijevanja, na osnovu ugovorenih uslova snabdijevanja planira proizvodnju električne energije, rezerviše raspoložive proizvodne kapacitete i/ili obezbjeđuje nedostajuće količine električne energije putem nabavke na tržištu, te određene količine električne energije opredjeljuje za potrebe konkretnog Kupca.

Rezervisanjem proizvodnih kapaciteta i ugovorenih količina električne energije za Kupca, JP Elektroprivreda BiH d.d. – Sarajevo odustaje od mogućnosti da iste količine električne energije proda drugim kupcima ili plasira na tržište u periodu kada tržišne cijene mogu biti povoljnije.

U slučaju raskida Ugovora od strane Kupca prije isteka perioda za koji su ugovorene količine električne energije, JP Elektroprivreda BiH d.d. – Sarajevo ostaje sa količinama električne energije planiranim za potrebe tog Kupca te ih je primorana plasirati na tržište pod uslovima koji važe u trenutku raskida Ugovora.

Prijevremeni raskid Ugovora izlaže JP Elektroprivreda BiH d.d. – Sarajevo dodatnom riziku promjene tržišnih cijena električne energije, odnosno riziku propuštene poslovne prilike (opportunity cost), koji proizlazi iz činjenice da su proizvodni kapaciteti i ugovorene količine električne energije bili rezervisani za Kupca, mogućem finansijskom gubitku, te uzrokuje i gubitak planirane ugovorne marže.

Navedene okolnosti predstavljaju poslovne i tržišne posljedice koje proizlaze iz obaveza preuzetih prilikom planiranja proizvodnje, rezervisanja proizvodnih kapaciteta i/ili obezbjeđenja nedostajućih količina električne energije putem nabavke na tržištu, te ugovaranja isporuke električne energije za konkretnog Kupca.

Član 4.

(Način određivanja naknade štete)

Nakon raskida Ugovora od strane Kupca prije isteka perioda za koji su ugovorene količine električne energije, Kupac je dužan Snabdjevaču nadoknaditi štetu za relevantne obračunske mjesece u iznosu od 10% prosječne mjesečne ugovorene vrijednosti.

Prosječna mjesečna ugovorena vrijednost predstavlja prosječnu mjesečnu vrijednost električne energije utvrđenu na osnovu ugovorenih količina i cijena električne energije važećih na dan prijevremenog raskida Ugovora.

Za potrebe obračuna naknade štete koristi se ugovorena cijena električne energije važeća na dan prijevremenog raskida Ugovora, bez cijene korištenja mreže, naknade za poticanje proizvodnje električne energije iz obnovljivih izvora energije i efikasne kogeneracije, PDV-a te drugih naknada koje nisu sastavni dio ugovorene cijene električne energije.

Naknada štete obračunava se prema sljedećoj formuli:

$$\text{Naknada štete po mjesecu} = 10\% \times \text{prosječna mjesečna ugovorena vrijednost}$$

Član 5.

(Obrazloženje visine naknade štete)

Naknada štete, u smislu ove Odluke, predstavlja paušalni iznos kojim se djelimično kompenzuju troškovi, rizici i poslovne posljedice nastale uslijed raskida Ugovora od strane Kupca prije isteka perioda za koji su ugovorene količine i cijena električne energije.

Naknada štete obuhvata naročito djelimičnu kompenzaciju sljedećih troškova i rizika:

- rizika plasmana obračunskih mjesečnih količina električne energije na tržištu po cijenama nižim od ugovorene cijene;
- gubitka planiranog prihoda i ugovorne marže za relevantne obračunske mjesece;
- tržišnog rizika nastalog zbog potrebe plasmana ranije planiranih i obezbijeđenih količina električne energije po tržišnim cijenama koje mogu biti nepovoljnije od ugovorenih cijena važećih u trenutku raskida Ugovora;
- posljedica rezervisanja proizvodnih kapaciteta i ugovorenih količina električne energije za Kupca koje zbog raskida Ugovora nije moguće realizovati u relevantnim obračunskim mjesecima;

- troška propuštene poslovne prilike (opportunity cost);
- troškova prilagođavanja planirane prodaje i upravljanja energetske portfeljom;
- administrativnih i organizacionih troškova povezanih sa prijevremenim raskidom Ugovora.

Visina naknade od 10% određena je kao unaprijed procijenjeni paušalni iznos koji se primjenjuje za svaki obračunski mjesec u periodu nakon raskida Ugovora, a prije isteka perioda za koji su važili ugovoreni uslovi snabdijevanja i ugovorene količine električne energije, te predstavlja razumnu i proporcionalnu procjenu dijela štete koja može nastati uslijed navedenih troškova i rizika, pri čemu ne predstavlja puni iznos moguće stvarne štete.

Utvrđivanje naknade štete na paušalan način omogućava ugovornim stranama da unaprijed poznaju posljedice prijevremenog raskida Ugovora te izbjegava potrebu za dugotrajnim i skupim sudskim postupcima, ekonomskim analizama i finansijskim vještačenjima.

Naknada štete iz ovog akta ne predstavlja ugovornu kaznu, već unaprijed određenu i ekonomski opravdanu naknadu koja predstavlja razumnu i proporcionalnu kompenzaciju tržišnog rizika i poslovnih posljedica kojima je JP Elektroprivreda BiH d.d. – Sarajevo izložena uslijed prijevremenog raskida Ugovora od strane Kupca.

Član 6.

(Stupanje na snagu)


Ova Odluka stupa na snagu danom donošenja i primjenjuje se na Ugovore o snabdijevanju električnom energijom za tržišno snabdijevanje koje zaključuje JP Elektroprivreda BiH d.d. – Sarajevo, kao snabdjevač.

Ova Odluka će biti objavljena na web portalu snabdjevača JP Elektroprivreda BiH d.d. – Sarajevo.

Za Upravu Društva

Generalni direktor

Dr. sci. Sanel Buljubašić



Broj: U-01-24686-1/26-267/20

Sarajevo, 11.08.2026. godine